

os pallidum, genæ contractæ, oculi mare intuen-
tes, labia tanquam vocem præ metu emittenti-
um nonnihil hiulca, manus taurum versus pro-
tentæ. ad mare autem eousque processerant,
vt pedis partem superiorem aqua pertingeret.
corporis totius status is erat, vt & ad taurum
contendere velle, & vndis credere se vereri vi-
derentur. mari color inerat duplex. terræ enim
propinquior pars subrubebat: remotior verò
& profundior cærulea erat. illic scopuli etiam
è terra proiecti extabant: quos è tumescentibus
& saxo allisis fluctibus facta spuma dealbabat.
Medio in mari pictus taurus ab vndis veheba-
tur, montis instar attollente se vnda, qua bo-
vis crura flectebantur. tauri dorso virgo infide-
bat, non equitum more, sed vtrisque dexterum
in latus pedibus aptè demissis, læuaque cornu,
quomodo habenas aurigæ solent, tenebat: ma-
num enim taurus sequebatur. Virginis pectus ad
pudenda vsq; alba tunica, corpus reliquum pur-
purea læna contegebatur: omnia tamen per ve-
stem cernere licebat. nam & profundus umbilicus,
& planus venter, & angusta ilia, verùm amplos
in lumbos desinentia perspiciebantur. papillæ mo-
dicè umebant, zonaque adducta vnà cum tunica,
A 4 quæ